

# Tí xroon ikjin ch'ín Pablo chr'énen ch'án tí ch'ín Tito

*Ch'ín Pablo nixjehé tí ch'ín Tito*

<sup>1</sup> Janhan Pablo mé t'ahá xra Dios la ko tsíkjeyána Jesucristo kíxin tsjákohá tí í so sín tsíkjeyá Dios kjaxin kíxin ts'itja sín tsongohe sín kíxin nkexrí chrókuinkáchónki sín tí nkehe chaxín. <sup>2</sup> Ntá ts'ejóchónhen sín tsochónta sín kjuachón jnkochríxín. Dios la xitjahya sich'ia la kaín tí nkehe tsíchrónka ch'án ósé tí naxá k'ónahya chjasintajni la mé xíkaha tsónhen. <sup>3</sup> Ntá tí yaon tsíntáchro Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'uetoan kíxin sit'ahá ch'án xra tsjákua itén ch'án. <sup>4</sup> Ikjian tí xroon i chr'anhan jaha Tito. T'íkuan éxi chaxín xjanna tí jaha kíxin yóíni tinkáchónkini Jesús. Kjuasáyé It'éni Dios la ko Jesucristo tí nkexro tsaáxinni, chrókjuintayavan la ko chrókuikonóha ch'án la ko chrótjáha ch'án kjuaxróxin.

*Tí xra sich'e tí ch'ín Tito chjasin Creta*

<sup>5</sup> Kuitoha jaha tí isla Creta kíxin jaha chrókuétuenhén tí sín siín ntiha kíxin nkexrí chrók'uejó sín la ko chrókónoxín nkexro ts'etoan kuènte jnkojnko ninko jnkojnko chjasin éxi tí kuétuanhan jaha. <sup>6</sup> T'ichjánxín kíxin tí nkexro ts'etoan xra kuènte ninko la jína chrókjuak'e kíxin kohya nkexro chrók'ueka jie, la ko chróchónta jnkokoá ichjién la ko tí xjeen sín chrókuinkáchónki Ínchéni kíxin tsokohya nkexro chrókjuanchia

jié kíxin jehya tí jína tjejóch'e sín, la ko kjaxin chrókójiehya sín.<sup>7</sup> Mé xíkaha tí nkexro ts'áyéhé tí xrə ts'etoan xrə kuènte njinko mé ts'etoan nkexrí tsonhen xrə kuènte Dios la ntá t'ichjánxín ijnko nkexro tsjenkayáxin jína, chrókjuasinha jie. La chrókjuinchehnkehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tneyá kjuaníkaon la ko chrókóxrjíenhya sín chrókjuich'ia sín ntá chrókjuacha sín chichaon.<sup>8</sup> Kjaxin jína chrókjuak'e ch'án kíxin tí tsjiji ijnko nkexro ntøe ch'án chrókuanjon ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án kíxin ijnko nkexro ó tsíkjinchetjóá Dios la ko chróchóntha ch'án kjuasáyé ch'án.<sup>9</sup> Kjaxin t'ichjánxín chrókuítøehya ch'án tí tan jína xrákohé ch'án kíxin ntá jína tsjakohé ch'án í so chojni tí nkehe ntoá la kjónté nkexro tjinkakonhya tsinhin la jína chróchenka ch'án chrókuinhin.

<sup>10</sup> Siín itsjé tí sín nínkaon mé tí sín a la mé tí sín judío la mé nixja sín éxí lontí sín mé xíkaha ch'iyehe sín chojni. <sup>11</sup> Tí sín a la chrók'uíkjhéni ir'va sín kíxin tjachròe sín nchónhya chojni kíxin tjako sín tí nkehe jehya jína kíxin chrókjuich'ia sín chrókjuacha sín nchónhya chichaon.

<sup>12</sup> Ijnko ch'ín kuènte chjasin Creta la mé tsíchrónka ch'án nkexrí tjejó tí sín chjasén ch'án. Ntáchro ch'án kíxin: “Kaín tí chojni chjasénni mé imá ch'ia sín la ko imá jiehe sín la ko imá kóchjinka sín la ko séhe sín”, mé xíkaha chrónka ch'án.<sup>13</sup> Tí nkehé tsíchrónka ch'án mé chaxín ntoá. Méxrə qantsí fuerte chrókjuéntuéhé sín kíxin

ntá jína chrók'uejó sín chróxraxinkaon sín Dios.  
<sup>14</sup> Nixjehé sín kíxin chrókuahya sín kuenté kaín tí nkehe tsík'axrjeníxín kja tí sín judío tjako la ko chrókuitekakonhya sín tí nkehe t'etqan tí sín nínkakonhen tí nkehe chaxín.

<sup>15</sup> Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhya la tjuáhya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáhya.  
<sup>16</sup> Ntáchro sín kíxin chóxin sín Dios a ntá tí t'ikonni nkexrí ch'e sín ó noexínni kíxin chaxínhya tíha la ch'ia sín. Jehe sín mé ntoáhya tjenkayáxin sín la ko jiehe sín la ko titekakonhya sín. A ntá tí xíkaha ch'e sín la, ¿nkexrí chrókjuich'e sín tí xra jína?

## 2

### *Chrókjuako ch'ín Tito tí tan chaxín*

<sup>1</sup> A ntá jaha chrókjuàkua éxí tí chrónka tí tan jína chaxín. <sup>2</sup> Tjákohé tí sín ó táda kíxin chrókókoanhya sín la ko jína chrók'uejó sín la ko chróchóntha sín kjuasáyé sín la ko chróchóntha sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókónínkakonhya sín kjónté tsjasóte sín.  
<sup>3</sup> A ntá kjaxin xíkaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxín sín ijnko kjuaxrexinkaon jína <sup>4</sup> kíxin xíkaha chrókjuakuexín sín tí chojni chjin tjarisoá a kíxin chrótjuèhe sín xìi sín la ko chrótjuèhe sín xjeen sín <sup>5</sup> la ko chrókjuich'e

sín xrā jína la ko ntoá chrókjuenkayáxin sín la ko jína chrók'uàyakonhen sín nchia ntqé sín la ko chrókójína sín la ko chrókuitekakonhen sín xii sín. Tí xíkaha chrókjuich'e sín chrókjuinchexiteyá sín la kohya nkexro chrók'uántaxínhin tí itén Dios tinkáchónkini.

<sup>6</sup> Kjaxin xíkaha chrókjuinchexraxinkávan tí sín ntasoá kíxin jína chrók'uejó sín chróchónta sín kjuasáyé sín. <sup>7</sup> Jaha mé chrókjuákoéxian sín kaín nkehe jína la ko chrókjuákohé sín kíxin ntoá chrók'uejó sín. <sup>8</sup> Jaha la chrónixja tí nkehe jína kíxin kohya nkexró chrók'uántaxín la ntá xíkaha chrókósuehé tí sín nínkaon la ntá kohya nkehe jínahya chróntáchro sín kuènte tí jeheni.

<sup>9</sup> Tétuenhén tí sín xrich'exón xrā kíxin chrókjuinchexiteyéhé sín tí lamo kuènte sín la ko chrókójína sín la ko chrónixjankiehya sín tí nkexro ch'ehe sín xrā <sup>10</sup> la ko kjaxin chrókueéhya sín kíxin jehya ijnko chojni chee tí jehe sín. Ntá kaín chojni chrók'uikon sín kíxin tjakoxin sín kíxin náxrjón tí itén Dios chrókuaáxinni.

<sup>11</sup> Kíxin Dios mé kjuakoxin ch'án kíxin nkexrí tjuèheni ch'án kíxin jehe ch'án mé tsaáxin kaín chojni. <sup>12</sup> Kjuasáyé Dios mé tjakohéni ch'án kíxin chrókuítgheni kaín nkehe jié la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. <sup>13</sup> Kjaxin chrók'uejóni jína kíxin chrókóchéheni chrók'uejóchónhenni tí yaon kjuachaxién Dios jié itsi Dios la ko Jesucristo tí nkexro tsaáxinni. <sup>14</sup> A ntá jehe ch'án mé k'uenyákonhenni ch'án kíxin tjinkaon ch'án tsaáxinni ch'án kíxin tsotjuáxin kaín jié chóntani

kíxin ntá jeheni mé ts'ónani ijnko chojni sich'ehe ch'án xrə la ko tsɔxrjínhínni sich'eni kaín xrə jína tjinkaon ch'án.

<sup>15</sup> Tíhi mé chrókjuàkua la ko chrókjuinchenxraxinkávan sín la ko chrókuétuéñhén sín kjuachaxiéen Dios. Chrókuítøéhya kíxin ninkexró chrókókjøniehyá tí nkehe tjàkua jaha.

### 3

#### *Jína chrók'uejó tí sín tinkáchónki Cristo*

<sup>1</sup> Chrókjuinchenxraxinkávan sín kíxin sinchexiteyéhe sín tí gobierno la ko tsitekaon sín ichrén xrə ts'etoan tí síxreé kíxin chrókjuich'e sín kaín xrə jína ts'etoan tí sín a. <sup>2</sup> La ko chrók'uántaxiéñhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxín sín kíxin jehya ijnko chojni nchehnke la chrókjuikosáyehe sín kaín chojni.

<sup>3</sup> Jeheni kjaxin ósé k'uélontini la ko k'uékitekakonhyani Dios. Chjini k'uék'ajini la k'uékóxrjínhínni kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxíenhenni í so chojni. <sup>4</sup> A ntá tí Dios tsaáxinni mé kjuakuexínni ch'án kixin jína ch'án la ko tjuèhe ch'án kaín chojni. <sup>5</sup> Jehe ch'án kuaáxinni ch'án la jehya kixin ichrén xrə jína chrókjuich'eheni ch'án. Náhí, ó jehí kuikonóeheni ch'án la ntá kjuinchekaáni ch'án la ko kjuinchetjóáni ch'án. Ntá kokjíhini nixin kixin tí Nchákuén ch'án la mé k'uáyèxinni kjuachón nixin. <sup>6</sup> Kjuasáyé Jesucristo tí nkexro tsaáxinni ntá kjuínchekitonhenni Dios Nchákuén ch'án kixin tsochóntani kjuachaxin

kuènté ch'án. <sup>7</sup> A ntá xíkaha kjuasáyé ch'án kjuínchetjóáni ch'án kíxin ntá tjejóchónhenni tí kjuachón jnkochríxín tsjanjon ch'án.

<sup>8</sup> Kaín tíha mé chaxín. Tjínkávan kíxin jaha chrókuétoan kaín tíha kíxin ntá kaín tí sín tinkáchónki Dios mé chrókuitekaon sín chrókjuch'e sín kaín nkehe jína. Kaín tí nkehe la mé jína la ko tsjinkitsa kaín chojni. <sup>9</sup> A ntá jaha mé títihé tí sín tjachaxin kichó sín lontí sín la ko títihé tí nkehe tinkáchónki sín kuènte tí sín tsík'axrjeníxín sín la ko títihé tí sín tjanjonxín tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

<sup>10</sup> Jnkojín nkexro tjinkaon tsjixrónkáxin tí tójnkotsé ninko ntiha la nixjehé ch'án jnkojína senó la ko yóxin ínaá ntá tí titekakonhya ch'án ntá títihé sátsji ch'án <sup>11</sup> kíxin ó noha kíxin tí chojni xíkaha a mé ntoáhya tjenkayáxin sín kíxin jehó sín nchek'ánkí sín ijjé sín.

### *Tí nkehe k'uetqan ch'ín Pablo*

<sup>12</sup> Tí tsétuanhan ch'ín Artemas la ko ch'ín Tíquico kíxin tsijií sín tí tjen jaha la ntá tjoka chrók'uinkatsjehé tí janhan chjasin Nicópolis kíxin ntiha tsjak'é ts'atsínkajia tí nchakuen kin.

<sup>13</sup> Jína chrókjúnkitsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kíxin ninkehó nkehe chrók'uitjáyanhya tí t'ichjánxinhin sín. <sup>14</sup> Ntá tí sín í so chrók'uitja sín nkexrí sich'e sín tí xra jína la ko chrókjúinkitsa sín kichó sín ichréñ nkehe t'ichjánxinhin sín kíxin chrókjuakoxín sín kíxin jína tjejó sín.

*Ó kjuixixín nixja ch'ín Pablo*

<sup>15</sup> Kaín tí nkexro tjékjan janhan ntihi nixjahá sín jnkojína. Jaha mé nixjehé kaín tí sín tinkáchónki Ínchéni ntiha mé kaín tí sín imá tjuèheni sín. Dios mé chrókjuincheyaonrá ch'án kaín rá. Amén. Ó tjen.

## Tí Nuevo Testamento cuènte Inchéni Jesucristo C'óna Nquìva

### New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

#### **Copyright Information**

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Popoloca, San Juan Atzingo

#### **© 1982, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

b9b09122-b3f6-59f0-9594-749907b32b5b